



ATASSUT

UPA14/30-1

Knud Kristiansen

13.05.2014

Danmarkimi kalaallit ilinniartut atugassaannik kollegie-nik sanaartornissaq siunertaralugu Naalakkersuisut suliasamik aallartitseqqullugit peqquneqarnissaannik Inatsisartut aalajangiiffisassaattut siunnersuut. (Siumup Atassutillu Inatsisartunut ilaasortai)

Siullermik ATASSUT-mit Naalakkersuisut qutsavigissavagut Siumut aamma ATASSUT suleqatigiillutik siunnersuutaannut ilassinnilluartumik tapersersuimmata.

ATASSUT-mit pingaartilluinnarparput nunatsinniit Danmarkimut aammalumi nunanut allanut ilinniariartut aallartartut ilinniakkaminnik naammassinnissimallutik nunatsinnut utertarumaartut.

ATASSUT-mit ilisimaarivarput inuiaqatigiinnut ilinniartut ilinniakkamik aallartikkaluarsinnarlutik ilaatigut inissaqarniarneq peqqutingalugu ilinniakkaminnik unitsitsiinnartariaqartarneri inuiaqatigiinnut akisoorujussuusinnaaneri.

Taamaattumik aamma manna iluatsillugu ATASSUT-mit kaammattuutigerusupparput ilinniakkamik qinnuteqannginnermi aamma aallartinnginnermi nunatta avataani ilinniariarnissami suut eqqumaffigineqartariaqarnersut erseqqissumik paasiniarluartaqqullugit – ilinnialertussatut aammalumi angajoqqaatut. Tassani paasissutissanik Danmark-imi Kalaallit Illui annertuunik pigisaqareerput minnerunngitsumillu aamma Danmark-imi Kalaallit Ilinniagaqartut kattuffiat AVALAK aamma tapertaalluarsinnaalluni.

ATASSUT-mit Naalakkersuisut paasilluarsinnaavagut nunatsinni ilinniagaqartut ineqarfiinik sanaartorniarneq salliutimassuk, taamaattumik aamma ATASSUT-mit Naalakkersuisunut kaammattuutigissavarput pisariaqarfiatigut Nunat Avannarliit ilaatigut immaqqa suleqatigalugit aaqqissuussisoqarsinnaasoq.



ATASSUT INATSIARTUNI

Aammattaaq manna iluatsillugu ATASSUT-mit Ilinniartitaanermut Naalakkersuisumut apeqqutigerusupparput Kalaallit ilinniagaqartut immikkut Danmark-imi ilinniarfinnut isersinnaatitaanermut aqqissuussinerata ukioq mannamiit allannguuteqarneratigut, ataasiaannarluni aqqissuussineq taanna aqquotingalugu Danmark-imi ilinniarfinnut isersinnaaneq sunniuteqassanersoq. Kalaallit siusinnerusukkut immikkut isumaqatigiissut aqquotingalugu ilinniakkamik aallartinnikuusimasut taava Danmark-imi ilinniaqqinnissaminnut qinnuteqarunik danskit allat ilinniakkanut qinnuteqaatiminnut assingalugit kingusingaatsiartukkut akissutisalisalissanersut?

ATASSUT-mit isumaqarpugut tamanna aamma pigaaruteqartoq eqqumaniarfigissallugu – piffissammi sulii sivikinnerulersup iluani isumannaarniarneqartalissammata nunatsinniit DK-mut nuunniarnissamut inissarsiornissamullu, tamannalu aamma sunniuteqaratarsinnaalluni ilinniagaqartut ineqarfiinut.

Taamatut ATASSUT-mit naatsumik oqaaseqarluta siunnersuutip akuersissutigineqarnissaa innersuussutigissavarput, neriuppugullu Naalakkersuisut kaammattuutigut tigulluarumaarai minnerunngitsumillu aamma ilinniartuulerumaartussat akisussaaqataanertik takutillugu sioqqutsilluarluni paasiniaalluni piareersaateqarluartarumaartut – inuiaqatigiinnut akisussaaqataaneq eqqarsaatigiinnarnagu inuttulli aamma annertuumik imminut akisussaaffiginermut pingaaruteqarmat.